



Na osnovu čl. 7. i 8. Zakona o ministarskim, vladinim i drugim imenovanjima („Službene novine Federacije BiH”, br. 12/03, 34/03 i 65/13), člana 64. stav 3. Zakona o zdravstvenoj zaštiti („Službene novine Federacije BiH”, br. 46/10 i 75/13), kao i Odluke o bližim kriterijima za imenovanja u upravne odbore zdravstvenih ustanova u vlasništvu Federacije Bosne i Hercegovine, odnosno jednog ili više kantona i Federacije Bosne i Hercegovine zajedno („Službene novine Federacije BiH”, br. 54/10 i 59/10), Ministrica zdravstva Kantona Sarajevo, objavljuje

PONOVNI JAVNI OGLAS
ZA NOMINIRANJE/IMENOVANJE NA UPRAŽNJENU POZICIJU
U UPRAVNOM ODBORU UNIVERZITETSKOG KLINIČKOG CENTRA SARAJEVO

1. Oglašava se upražnjena pozicija u Upravnom odboru Univerzitetskog kliničkog centra Sarajevo (u daljem tekstu: UO UKCS), i to dva (2) člana, predstavnika Kantona Sarajevo, kao suosnivača.

2. OPIS POZICIJE:

Djelokrug rada upravnog odbora u smislu člana 65. Zakona o zdravstvenoj zaštiti je:

Donosi statut zdravstvene ustanove, imenuje i razrješava direktora odnosno v.d. direktora zdravstvene ustanove, utvrđuje planove rada i razvoja zdravstvene ustanove, utvrđuje godišnji program rada, donosi finansijski plan i usvaja godišnji obračun, donosi opšte akte o unutrašnjem uređenju i sistematizaciji poslova i druge opšte akte, saglasno zakonu i statutu zdravstvene ustanove, odlučuje o svim pitanjima obavljanja djelatnosti radi koje je zdravstvena ustanova osnovana, ako zakonom nije određeno da o određenim pitanjima odlučuje drugi organ zdravstvene ustanove, usmjerava, kontroliše i ocjenjuje rad direktora, rješava sva pitanja odnosa sa osnivačem, odlučuje o korišćenju sredstava preko iznosa utvrđenog statutom zdravstvene ustanove, odgovara osnivaču za rezultate rada zdravstvene ustanove, odlučuje o prigovoru zaposlenika na rješenje kojim je drugi organ određen statutom zdravstvene ustanove odlučio o pravu, obavezi i odgovornosti zaposlenika iz radnog odnosa, podnosi osnivaču najmanje jedanput godišnje izvještaj o poslovanju zdravstvene ustanove, obavlja i druge poslove u skladu sa zakonom i statutom zdravstvene ustanove.

Članove UO UKCS-a iz Kantona Sarajevo kandiduje Vlada Kantona Sarajevo, na prijedlog Ministrice zdravstva Kantona Sarajevo, a konačno imenovanje vrši Vlada Federacije Bosne i Hercegovine, na prijedlog Federalnog ministra zdravstva. Mandat članova upravnog odbora traje četiri (4) godine, uz mogućnost ponovnog imenovanja.

3. UVJETI KOJE TREBA DA ISPUNJAVAJU KANDIDATI:

Kandidati koji se kandiduju za poziciju u UO UKCS-a dužni su ispunjavati opće i posebne uvjete, i to:

3.1. Opći uvjeti

- da je državljanin Bosne i Hercegovine (dokaz: uvjerenje o državljanstvu ne starije od šest mjeseci),
- da nije otpušten iz državne službe kao rezultat disciplinske mjere na bilo kojem nivou u Bosni i Hercegovini u periodu od tri (3) godine prije dana objavljivanja ovog oglasa (dokaz: izjava kandidata potpisana i ovjerena od strane nadležnog organa),
- da se na njega ne odnosi član IX.1. Ustava Bosne i Hercegovine (dokaz: izjava kandidata potpisana i ovjerena od strane nadležnog organa),
- da nije na funkciji u političkoj stranci, u smislu člana 5. Zakona o ministarskim, vladinim i drugim imenovanjima Federacije Bosne i Hercegovine (dokaz: izjava kandidata potpisana i ovjerena od strane nadležnog organa),
- da nije izabrani zvaničnik, nosilac izvršne funkcije ili savjetnik u smislu Zakona o sukobu interesa u organima vlasti u Federaciji Bosne i Hercegovine (dokaz: izjava kandidata potpisana i ovjerena od strane nadležnog organa),

- da nema privatni – finansijski interes u UKCS (dokaz: izjava kandidata potpisana i ovjerena od strane nadležnog organa),
- da nije osuđivan za krivično djelo nespojivo s dužnošću u UO UKCS (dokaz: izjava kandidata potpisana i ovjerena od strane nadležnog organa, da će u slučaju da bude izabran dostaviti uvjerenje da nije osuđivan za krivično djelo nespojivo s dužnošću u UO UKCS),
- da nije direktor zdravstvene ustanove odnosno zavoda (dokaz: izjava kandidata potpisana i ovjerena od strane nadležnog organa),
- da nije član ni u jednom upravnom odnosno nadzornom odboru ustanove, zavoda, odnosno privrednog društva sa većinskim državnim kapitalom (dokaz: izjava kandidata potpisana i ovjerena od strane nadležnog organa).

3.2. Posebni uvjeti

- da ima završen VII stepen stručne spreme pravnog, ekonomskog, tehničkog i zdravstvenog usmjerenja (dokaz: diploma odnosno uvjerenje – fotokopija ovjerena od nadležnog organa),
- da ima najmanje 5 godina radnog iskustva na poslovima svog stručnog naziva (dokaz: potvrda o radnom iskustvu),
- da ima stručno znanje iz djelatnosti UKCS-a, te da je upućen u sadržaj i način njegovog rada (dokaz: izjava kandidata potpisana i ovjerena od strane nadležnog organa),
- da ima sposobnost upravljanja finansijskim sredstvima i ljudskim resursima, kao i sklonost timskom radu (dokaz: izjava kandidata potpisana i ovjerena od strane nadležnog organa).

Kandidati su dužni uz prijavu, koja sadrži kraću biografiju, adresu i kontakt telefon, priložiti originalne dokumente ili ovjerene fotokopije dokumenata ne starije od 6 mjeseci, kao dokaz o ispunjavanju općih i posebnih uvjeta traženih ovim oglasom.

Prijave sa traženim dokumentima se dostavljaju lično ili poštom preporučeno, sa naznakom “PRIJAVA NA PONOVI JAVNI OGLAS - UO UKCS – NE OTVARAJ” na sljedeću adresu: Ministarstvo zdravstva Kantona Sarajevo, ul. Reisa Džemaludina Čauševića br. 1, Sarajevo.

Prijave koje ne sadrže propisano iz ovog oglasa, kao i prijave podnesene istekom roka utvrđenog u ovom oglasu, odbacit će se kao nepotpune, odnosno neblagovremene, te se kao takve neće uzeti u razmatranje.

Oglas ostaje otvoren 15 dana od dana posljednjeg objavljivanja ovog oglasa, a isti će biti objavljen u „Službenim novinama FBiH“, u dnevnim novinama „Avaz“ i na web stranici Ministarstva zdravstva Kantona Sarajevo: <http://mz.ks.gov.ba>.

Svi kandidati koji budu stavljeni na listu sa užim izborom, biće pozvani na intervju pred Komisijom za izbor.

Prije intervjua kandidati su dužni dati podatke o ranijim neposrednim rukovodiocima od kojih se mogu dobiti preporuke i informacije.

Kandidati koji budu izabrani sa Liste užeg izbora kandidata koji ispunjavaju uvjete iz javnog oglasa dužni su dostaviti uvjerenje da nisu osuđivani za krivično djelo nespojivo s dužnošću u UO UKCS izdato od nadležnog MUP-a – Uprava policije, u roku od 10 dana od dana prijema obavijesti o izboru. U slučaju da se ustanovi da izabrani kandidat ne ispunjava uvjet po ovom osnovu, njegova prijava će se odbaciti kao nepotpuna, a izabrat će se sljedeći najuspješniji kandidat sa Liste užeg izbora kandidata, pod istim uvjetima.

Na rješenje o imenovanju na pozicije u Upravnom odboru Univerzitetskog kliničkog centra Sarajevo, zainteresirana stranka može podnijeti prigovor na konačno imenovanje u skladu sa Zakonom o ministarskim, vladinim i drugim imenovanjima Federacije Bosne i Hercegovine.

Nakon završene procedure imenovanja, prijava i dokumentacija se neće vraćati kandidatima koji su aplicirali na ovaj ponovni javni oglas.

MINISTRIČA
Zilha Ademaj, dipl. oec., s.r.



web: <http://mz.ks.gov.ba>
e-mail: mz@mz.ks.gov.ba
Tel: + 387 (0) 33 562-104, Fax: + 387 (0) 33 562-243
Sarajevo, Reisa Džemaludina Čauševića 1

